

PM-Jallianwala Bagh

प्रधानमंत्री नरेन्द्र मोदी होरें जलियांवाला बाग दे शहीदें गी श्रद्धांजलि भेंट कीती ऐ। सोशल मीडियो दी पोस्ट राएं उनें आखेआ जे औने आलियां पीढ़ियां शहीदें दी अदम्य भावना गी म्हेशां चेता रक्खगंन। उनें आखेआ जे जलियांवाला बाग साढ़े मुल्ख दे इतिहास दा इक काला ध्याह् ऐ। मोदी होरें आखेआ जे शहीदें दा बलिदान भारत दे स्वतंत्रता संग्राम च इक महत्वपूर्ण ध्याह् ऐ। जलियांवाला बाग दी अज्ज बरेंगंड ऐ। इस दिन राश्ट्र उनें सैंकड़े बद्धे निर्दोष लोकें गी बी चेता करदा ऐ जिनें 1919 च जलियांवाला बाग च ब्रिटिश अधिकारी जनरल डायर नै कत्ल करी दित्ता हा।

<><><><><><>

Baisakhi Festival

बसाखी दा ध्यार पंजाब ते उत्तर भारत दे होरने किश राज्यें दे इलावा अज्ज जम्मू कश्मीर च बी मते उत्साह, सद्भाव ते भाईचारे कन्नै मनाया जा'रदा ऐ। फसलें दी बाहड़्डी कन्नै जुड़े दे इस ध्यार गी डुग्गर च बसोआ जां बसोए दा ध्यार बी आखेआ जंदा ऐ। जेहड़ा करसाने लेई नमीं रूत दी शुरूआत दा बी प्रतीक ऐ।

<><><><><><>

Baisakhi Greetings

उपराज्यपाल मनोज सिन्हा ते मुख्यमंत्री उमर अब्दुल्ला होरें जम्मू कश्मीर दे लोकें गी बसाखी दी ममारकबाद ते शुभकामनां दित्तियां न। उपराज्यपाल होरें अपने ममारकी सनेए च करसाने दे योगदान दी सराहना कीती ते लोकें गी श्री गुरु गोविंद सिंह जी आदर्श गी अपनाने दी अपील कीती। उमर अब्दुल्ला होरें इस ध्याड़े गी साढ़ी संस्कृति ते राई-बाई दिएं रम्पराएं दा प्रतीक दस्सदे होई जम्मू कश्मीर च रमानदारी, सद्भाव, तरक्की ते खुशहाली दी कामना कीती।

<><><><><><>

Tawi Riverfront

बसाखी दे मौके पर जम्मू स्मार्ट सिटी, जम्मू नगर निगम ते सैलसफा निदेशालय किट्टे रलियै केई कार्यक्रमें दा सरिस्ता करै करदे न जिंदे च विक्रम चौक पर सूर्जपुत्री तवि दे सब्बे कंडे तवि रिवर फ्रंट पर रिवायती छिंज ते तवि आरती दा आयोजन बी शामिल ऐ। तोआई बसाखी दे मौके पर सैलसफा विभाग आस्सेआ श्रीनगर दे जबरवन पार्क च बी विशेष रंगारंग सांस्कृतिक आयोजन कीता जा'रदा ऐ।

<><><><><><>

Dy CM

उपमुख्यमंत्री सुरिन्दर चौधरी होरें अखनूर स्थित सरकारी आर्युवेदिक मैडिकल कालेज ते नर्सिंग कालेज दा चानचक्क दौरा लाया ते चला'रदे विकास कम्में दा जायजा लैता। इस दरान अधिकारिएं उनेंगी मंजूरशुदा परियोजना जेहदे च जागतें ते कुड़िएं लेई होस्टल शामिल ऐ, दी जानकारी दित्ती। इनें होस्टलें लेई 6 करोड़ 39 लक्ख ते 6 करोड़ 50 लक्ख रपे बिलतरतीब खर्चा औग। उनें नर्सिंग कालेज ब्लाक पर 2 करोड़ 64 लक्ख रपे दा खर्चा औग। उपमुख्यमंत्री होरें कम्मे दे म्यार दा जायजा लैता। उनें कम्में गी तेज रफतार कन्नै मुकम्मल करने ते उच्च मानकें गी बनाई रखने पर जोर पाया। एहदे थमां लोकें गी थोने आले लाह

गी उजागर करदे होई चौधरी होरें कम्में च आवा'रदी रूकावटें गी दूर करने ते परियोजना गी 10 थमां 12 म्हीने दे समें अंदर पूरा करने लेई आखेआ।

<><><><><><>

CS-RIDF Meet

मुख्य सचिव अटल डुल्लू होरें मते अख्तेयारें आली कमेटी दी बैठक लाइयै ग्रामीण ढांचागत विकास फंड दी परियोजनाएं जिनें गी नाबार्ड आस्सेआ हत्थे च लैते गेदा ऐ, दे कम्में दी प्रगति दा जायजा लैता। एह कम्म जम्मू कश्मीर दे बक्ख-बक्ख सेक्टरें च चलाए जा'रदे न। मुख्य सचिव होरें कम्में गी समें सिर पूरा करने पर जोरपाया ते परियोजनाएं दे मुकम्मल होने बारे प्रमाणपत्र जमा करोआने लेई बी आखेआ तां जे परियोजनाएं लेई फंड मुहैया होई सकन।

<><><><><><>

DC-Jammu Visit

जम्मू दे डिप्टी कमीशनर सचिन कुमार वैश्य होरें जम्मू नार्थ ते मढ़ तैहसील दा व्यापक दौरा लाया। अपने दौरे दरान उनें राजस्व मैहकमे दे कम्मकाज गिरदौरी आले पंजीकरण ते एसडीएम ते तैहसील दफतरें दे कम्में दा बी जायजा लैता। सरकारी हाई स्कूल पक्खिया च अमले दी गैर मजबूतगी लेई कारण दस्सो नोटिस जारी करने दिशा हिदायतां दित्तियां। इस दौरे दा मकसद सरकारी तंत्र गी मजबूत बनाना ते लोक सेवा आले सरिस्ते गी बेहतर करना ऐ।

<><><><><><>

Weekly Theater Initiative

जम्मू कश्मीर कला संस्कृति ते भाषा सरबंधी अकादमी आस्सेआ अभिनव थेटर च साप्ताहिक थेटर श्रृंखला तैहत साप्ताहिक रंगधार दी शुरूआत कीती गई। सचिव हरविंद्र कौर होरें आखेआ जे इस जतन दा मकसद प्रदेश च थेटर संस्कृति गी बढ़ावा देना ऐ। साप्ताहिक रंगधारा दा पैहला गेड़ जम्मू च शुरू होआ ते दूआ गेड़ मई च कश्मीर च शुरू होग।

<><><><><><>

Cricket-Poonch

शहीद मंजीत सिंह मैमोरियल टी-20 क्रिकेट प्रतियोगिता खेड़ड स्टेडियम पुंछ च सम्पन्न होई गेआ। 2003 च देश आस्तै अपनी जिंदू दा बलिदान देने आले डी.एसपी मंजीत सिंह हुंदी शहादत दे सम्मान च आयोजित प्रतियोगिता च जिले भर थमां 32 टीमें हिस्सा लैता। डिप्टी कमीशनर पुंछ विकास कुंडल ते एसएसपी शफकत हुसैन होरें इस पैहल दी सराहना कीती। उनें जेतुएं ते उप-विजेता गी ट्रॉफियां, सर्टिफिकेट ते नगद इनाम प्रदान कीते।

<><><><><><>